

【经文信息】大正藏第 24 册 No. 1475

## 沙弥尼离戒文 1 卷

No. 1475

### 沙弥尼离戒文(沙弥尼戒经)

东晋失译

善女人字某言。某所受秽恶之身。充弊人流不堪下行。克己自悔。愿为弟子。受持正戒终身奉行。

用何等故。作沙弥离。用归命佛归命法归命比丘僧故。用剃头被袈裟故。几戒沙弥离。有十戒。

一尽形寿不得杀生。不得教人杀生。

二尽形寿不得盗。不得教人盗。

三尽形寿不得淫。不得教人淫。

四尽形寿不得嫁。不得教人嫁。

五尽形寿不得妄语。不得教人妄语。六尽形寿不得歌舞。不得教人歌舞。不得弹箏吹笛。

七尽形寿不得着香华脂粉。不得教人着脂粉。

八尽形寿不得于高好刻镂床上卧。不得教人作好床卧。

九尽形寿不得饮酒。不得教人饮酒。

十尽形寿过日中不得复食。不得教人食。

威仪七十事。

[\[目录\]](#)

不得着缯彩衣      不得作彩衣与人  
不得恶口相调      不得教人作不急语

不得与优婆夷相看形体大笑。

不得于避处裸形自弄身体。

不得照镜摩捋面目画眉。

不得瞋恨羞惭恚语。

不得思念与男子共交会问优婆夷何如。

不得坐毛绵上。不得着鞞履。不应作履。

不得贪家钱财强索人物。

不得坐。他妇女床上开器视衣言是好彼丑十六以上应作沙弥离。素无瑕秽贞良完具。无所毁辱。父母见听乃得为道。素不贞良不应为道。石人匿病不应为道。

不得与比丘僧同室宿。不得共坐。不得相形笑。不得卧沙弥离衣被中。不得错法衣共器误着僧衣。不得手授男子物。设欲与物。当置着地却使取之。不得与优婆夷露浴。不得独至僧房问义。不得说浴事。不得笑经语。不得左右顾视。不得手据机上。

受经有五事。当与长老尼共行。去坐六尺。长跪。但得问义。当识句逗。

省师病有四事有亲应得省。三人共行。去床六尺。长跪问讯语讫应去不得论事。

夜卧有五事。当头输佛。当偃卧不得申脚。不得仰向频申。不得袒裸自露。不得手近不净处。

至檀越家有五事。当先到精舍礼佛。次礼师僧优婆夷请乃应入。当报师僧。直视六尺当独坐床。

止檀越家。有五事不应法。不得至妇女房中语戏。不得至灶下坐食。不得与婢共私语。不得独至舍后。不得与人共上厕。不得上男子厕上。

入浴室有五事。不得与优婆夷共洗。不得与婢使共洗。不得与小儿共洗。不得取他成事水。不得自视形体隐处。

烧香有五事。不得左右远视。不得独与优婆塞共烧香。不得独与婢使。不掣脚。不得背像。朝起有五事。先当清净却着法衣。先礼经像。却礼师僧。去六尺问讯。却行出户。师与语有五事。问经戒义不知当请。若见责当即自悔过。不得覆藏。不得自理。不得恶眼视师。

浣衣有四事。当于屏处当长跪。当弃恶水于屏处。不得于人道径中。当待干燥应収。不得令堕地。

行道有五事。当与三人共行。当与大尼共行。若当与优婆夷共行。当视前六尺。当着法衣。师云。女人受性大出杂态姿。则熹好淫泆无礼。故为女人。今以自觉。得蒙释迦文佛大恩。普三界开视地道得值法。其有自识本行。归念佛者少。

佛言。观见人间。上至二十八天。下至十八地狱。皆苦无乐。故结戒以训后生。佛告诸弟子。为道至难。勉强能去家断绝六情。受佛重戒捐弃爱欲。有其然者少。

佛告诸弟子。汝慎莫妄度沙弥离。女人姿态难保悦。在须臾以复更生恶意。譬如水泡一起一灭。无有常定。能见人根观其大行。见其宿罪。今以尽度。便得道者急当度之。自非菩萨阿罗汉。不可度尼。

除覲说戒节度。

维那先具舍罗筹香火戒文。净扫除精舍。却鸣捷槌。烧香礼佛呗呪愿意。呪愿鬼子母。各便就坐。整法服叉手静默。维那便行香火人。各说一偈。维那在户里三唱。白衣出除覲布萨竟。三弹指令白衣远去。莫令闻说戒音声讫。开户维那唱言。静坐除覲默今布萨。亦三过唱讫。便维那捉筹。上座尼前长跪。布萨人与一筹。亦自取讫。便还敛筹。别着一处。还取未布筹。手捉从上座尼前问。谁脱不受筹。未得者便当言未。已得者当默讫竟。维那数筹有几人。数知少多。维那唱言。除覲等若干人。随年号月。十五便言十五日。

月尽便言三十日。于某州某郡某县某檀越精舍中说戒。愿持说戒功德归流。大檀越眷属一切安隐。命过者生天人中增益功德。十方厄难普使解脱。各呪愿讫。维那长跪上座尼前。请能说戒人令说戒。复请一人三呗读经。读经竟呗。呗讫。上座普呪愿。下座尼皆长跪受呪愿。维那唱。皆共礼佛礼般若讫。下坐尼皆礼大尼讫。便维那长跪唱言。随所安。

请说戒读经人。共别坐一床上。

## 沙弥尼离戒文

按此戒名。国本宋本及开元录。皆云沙弥尼离戒文。丹本即云沙弥尼杂戒文。今捡正文。诸本皆非。何则。按此译之离字。与他译之尼字。但梵音楚夏耳。曾不是沙弥尼之离戒文。亦不是沙弥尼之杂戒文。并乖正文。故今可直云沙弥离戒文。乃正耳。然无所据。不敢即正。直书其意。以待好古雅正君子焉。

---

【经文信息】大正藏第 24 册 No. 1475 沙弥尼离戒文

【版本记录】CBETA 电子佛典 Rev. 1.13 (Big5), 完成日期: 2009/04/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 伽耶山基金会提供, 北美某大德提供

【其他事项】本数据库可自由免费流通, 详细内容请参阅【中华电子佛典协会数据库版权宣告】

---